

UPA 2018-imi saqqummiunneqartussamik utoqqalinersiallit siusinaartumillu sulisinnaajunnaarnersiutillit saniatigut sulisarnermi pisartakkaminnik ilanngaaffigititarunnaarnissaata kinguneqaataanik Naalakkersuisut misissuinissamik peqquneqarnissaat pillugu Inatsisartut aalajangiiffissaattut siunnersuut.
(Inatsisartunut ilaasortaq Villy Olsvig, Inuit Ataqatigiit)

Akissuteqaat

(Isumaginninnermut, Ilaqutariinnermut, Naligiissitaanermut, Inatsisinillu atuutsitsinnermut Naalakkersuisoq)

Siullermeerneqarnera

Siunnersuutigineqartumut Inatsisartunut ilaasortaq Villy Olsvig-mut qujavunga.

Utoqqalernersiutillit siusinaartumillu sulisinnaajunnaarnersiutillit tamarmik, sulisinnaasut sulerusuttullu tamatumunnga aammattaq periarfissinneqartariaqartut ersarippoq.

Siusinaartumik sulisinnaajunnaarnersiutillit amerlasuut killilimmik sulisinnaassuseqarput, suliffeqarneq aqutigalugu inuiaqatigiinnut ilaalernissaminnik kissaateqartut. Amerlasoorpassuarnut inuunermi nalillit pitsaanerulersarput. Ullaakkut makinissamut pissutissaqalernerq, inuiaqatigiinnillu sinneruttut peersitaasullu misigisimajunnaarneq, suleqatinik ilaqarneq, tassaapput amerlanernut pingaaruteqartut. Taamaattumik siusinaartumik sulisinnaajunnaarnersiutillinnut sulisinnaassuseqartunut eqaannerusumik suliffeqarsinnaaneq aamma atuutilersinneqarpoq. Nalinginnaasumik suliffeqarnermi allat ikiorneqaratik sulisinnaalersimapput amerlasuullu ingerlalluarput.

Suliffeqarfiit amerlasuut innuttaasut annikinnerusumik sulisinnaassuseqartut ullup ilaanaa suliffissamik neqeroorfiginissaat soqutigaat, aamma siusinaartumik sulisinnaajunnaarnersiutillit killilimmik sulisinnaassuseqartut suliffimmik neqeroorfiginissaannut kommunini qanoq ineriartortoqarnerisq malittareqqissaarparput. Pisariaqartinneqartunik eqaannerusumik suliffeqartitsisinnaanermik pilersitsinarneq kissaatigineqartutut sukkatiginngitsoq maanna takusinnaalereerparput. Taamaattumik misissortariaqarparput.

Utoqqalinersiuteqartitsinermi nutaami ilaatinneqarput pineqartut marluk, tassa nukissaqaraanni kissaatigigaannilu, sipaarsinnaanissap imminut akilersinnaanissaa, ilaatigullu suliffeqarfimmiiginnarsinnaanissap imminut akilersinnaanissaa. Taamaattumik utoqqalinersiuteqartitsineq nutaaq imatut aamma aaqqissuunneqarpoq, suliinnarusuttunut sipaarniuteqarsimasunullu atugassarititaasut annertuumik pitsannguiffiqineqarlutik.

Soorunami utoqqalernersiuteqartitsineq siusinaartumillu suliunnaarnersiuteqartitsineq malinnaavigeqqissaarparput, qanoq piviusunngortinneqarneqarnerani sunniutaasunut aaqqiisoqarnissaanillu pisariaqartitsisoqarsinnaaneranut naleqqiullugu.

Tassunga ilaatillugu – siunnersuutigineqartut – saniatigut aningaasarsiaqarnerup kinguneranik utoqqalinersiat siusinaarlunilu sulisinnaajunnaarnersiutisiat ikililernerqarunnaarnerisa kingunerisassaannik mississuititsineq aallartinniarpara.

Naalakkersuisut inassutigaa siunnersuut akuerineqassasoq.